

Ս. ԹԱԴԵՈՍ ԵՎ Ս. ԲԱՐԴՈՒՂԻՄԵՈՍ

ԱՌԱՔՅԱԼՆԵՐԻ ՏՈՆԸ

ՄԱՅՐ ԱԹՈՒ Ս. ԷԶՄԻԱԾՆՈՒՄ

Դեկտեմբերի 4-ին Հայ Առաքելական Եկեղեցին տոնում էր Հայաստանում քրիստոնեության առաջին ուսույիչների՝ Ս. Թադեոս և Ս. Բարդուղիմեոս առաքյալների տոնը: Որպես քարոզչության խորհրդի ոգեկոչում, արդեն հինգերորդ տարին է, ինչ երջանկահիշատակ Գարեգին Ա Կաթողիկոսի հատուկ պատգամով սբ. առաքյալների տոնը հռչակված է նաև քրիստոնեական դաստիարակության օր:

Այդ օրը Մայր Աթոռ Ս. Էջմիածնում, ի հիշատակ հայոց առաջին լուսավորիչների, մատուցվեց Ս. Պատարագ: Ն.Ս.Օ.Տ.Տ. Գարեգին Բ Ամենայն Հայոց Կաթողիկոսի բարձր նախագահությամբ տոնակատարությունը շարունակվեց Էջմիածնի մշակույթի տանը, ուր Ամենայն Հայոց Կաթողիկոսի օրհնությամբ քրիստոնեական կրոն դասավանդող ուսույչի վկայական հանձնվեց Մայր Աթոռ Ս. Էջմիածնի Քրիստոնեական Դաստիարակության և Քարոզչության Կենտրոնի երկամյա դասընթացներն ավարտած 228 ուսույչի:

Արագածոտնի թեմի նորանշանակ առաջնորդական տեղապահ Տ. Վազգեն վրդ. Միրզախանյանը, որ չորս տարի շարունակ ղեկավարում էր ԶԴԶԿ-ի աշխատանքները, կարևորելով քրիստոնեական դաստիարակությունը, նշեց, որ կենտրոնի կարևորագույն նպատակներից մեկը կրոնի ուսույիչների պատրաստումն է: Ինչպես տեղեկացրեց Հոգեշնորհ Հայրը, վերջին հինգ տարիների ընթացքում կրոն դասավանդող ուսույիչների երկամյա դասընթացներ են կազմակերպվել Արարատյան Հայրապետական, Արմավիրի, Արագածոտնի, Գուգարայ և Սյունյայ թեմերի 11 քաղաքներում: Երկու տարի առաջ կրոն դասավանդող ուսույչի որակավորում է ստացել ևս 335 ունկնդիր: Այսօր կրոնի ուսույիչները դասավանդում են Հայաստանի շուրջ 50 կիրակնօրյա և հարյուրից ավելի հանրակրթական դպրոցներում:

Գոհունակությամբ նշելով, որ կրոն առարկան պետականորեն արդեն ընդգրկված է Արցախի և Զաշաթաղի շրջանի հանրակրթական դպրոցների ծրագրում, Հայր Վազգենը բացառիկ իրադարձություն համարեց Արցախի թեմի Ստեփանակերտ և Շուշի քաղաքներում վերջին երկու տարիներին կազմակերպված կրոնի շուրջ 180 ուսույիչների պատրաստման ուսումնական

հավաքները, ինչի արդյունքում Արցախի 150 և Զաշաթաղի 30 դպրոցներ ապահովվեցին կրոնի ուսույցիչներով:

Իր օրհնության խոսքն ուղղելով հանդիսությանը ներկա մանկավարժներին, Վեհափառ Հայրապետը բարի առաքելություն մաղթեց նրանց՝ նշելով, որ նրանք են այսօր առաքյալների գործի ժառնագորդը: «Մենք հավատում ենք, որ չեք առաքելությունը պետք է պսակվի հաջողությամբ, որ անաղարտ մնա մեր հավատքը, որ ոչ ոք չկարողանա սասանել հիմքերը մեր հավատքի», - ասաց Վեհափառ Հայրապետը:

Հանդիսության ընթացքում բանախոսությամբ հանդես եկավ և ուսույցիչներին իր բարեմաղթանքը հայտնեց նաև Երևանի պետական համալսարանի Աստվածաբանական ֆակուլտետի դեկան Ռեդ. Տ. Շահե արքեպս. Աճեմյանը: Իսկ ցուրտ դահլիճի սառնությունն իրենց գեղեցիկ գեղարվեստական հայտագրով ջերմացրին ԲՂԲԿ-ի մանկական երգչախումբն ու ջութակահարների կամերային համույթը:

ՄԱՍՆՈ ԴԻՎԱՆ ՄԱՅՐ ԱԹՈՌԻ